



Udruženje logorasa BiH - USA iz St. Louisa izrazava punu podršku zrtvama rata iz BiH koje su ovih dana u pripremanju pred odlazak u Den Haag na početak suđenja najvećem zločincu XX vijeka, Radovanu Karadžiću.

Predsjednik - Sejad Muhic

Saopćenje za javnost

Ovih dana se za odlazak u Den Haag spremaju naše Bošnjakinje i Bošnjaci, oni koji su preživjeli, na svojoj koži osjetili i svojim očima vidjeli svako od njih po svoj dio strahota četničko-ustaške agresije na Bosnu i Hercegovinu. Odlaze u Den Haag da prisustvuju i svjedoče na suđenju najvećem zločincu nakon Drugog svjetskog rata, Radovanu Karadžiću, srpskom Hitleru. Premda se ova haška suđenja najčešće pretvaraju u farsu ipak možemo očekivati decidirano postavljenu i transparentnu optužnicu, korektno i vremenski efektivno suđenje, te donošenje jedine moguće presude.

Naime, da Karadžić u Den Haagu dobije i sto doživotnih robija, to neće oprati prljave ruke i ostatke ostataka obraza takozvane međunarodne zajednice koja je i dopustila nezapamćene zločine provedene nad bosanskim Muslimanima, odnosno Bošnjacima. Nikakva kazna, međutim, neće biti satisfakcija hiljadama i hiljadama majki koje su ostale bez sinova, hiljadama i hiljadama žena koje su ostale bez muževa, hiljadama i hiljadama silovanih bošnjačkih (muslimanskih) djevojčica, djevojaka i žena, nikakva kazna neće iz mezara i skrivenih masovnih grobnica oživjeti oko dvije stotine hiljada mrtvih Bošnjaka (muslimana), te nikakva kazna neće vratiti osmjeh na lice Bosne i Hercegovine koja je demografski, ekonomski i konačno, psihološki uništena ovim ratom. Mi znamo da je i buduća presuda Radovanu Karadžiću samo jedna pravna farsa. Kao što su farse i parade bile druge presude gore spomenutog suda.

Naime, ta ista takozvana međunarodna zajednica koja je i osnovala ICTY, sjedila je skoro četiri godine skrštenih ruku praveći se slijepa, gluha i nijema za bošnjačke jade i muke. Svakom na Planeti je jasno da je ovo bio dozvoljeni zločin i dozvoljeni genocid nad Bošnjacima (muslimanima), jer da je bilo gdje u Evropi u kratkom roku ubijeno „samo“ hiljadu pasa, a da ne govorimo da je ubijeno „samo“ hiljadu kršćana, ili u još gore slučaju samo „stotinu“ Jevreja nadigla bi se dreka do neba i ta praksa ubijanja bi bila odmah zaustavljena. Pošto se radilo o Bošnjacima – muslimanima i to u Evropi dato je zeleno svjetlo za njihovo fizičko uništavanje, za genocid nad njima, te za sve nezapamćene zločine koji su nad nama bili dopušteni.

U Evropi ima na hiljade udruženja za zaštitu životinja, a nema ni jedno za zaštitu života onih koji su one vjere koja je sada na svjetskim potjernicama. Pitamo se kada će se naći neki Emile Zola da upre prstom i optuži Evropu, koja se krije iza zaštićenog znaka takozvane međunartosne zajednice? Mi, međutim, ostajemo ponosni Bošnjaci, muslimani koji ne da nikad neće ostaviti svoju vjeru, već će s islamom srastati da budu prst i nokat. Iako smo rastjerani po cijelom svijetu, svugdje s ponosom možemo kazati ko smo i šta smo, te da nam je domovina ostala samo cjelovita Bosna i Hercegovina, za koju su prolivene rijeke bošnjačke krvi, a što se sada nastoji zaboraviti i dekorativno sanirati ovim šupljim presudama.